

建州女直考
物異考

燕市雜詩
夷俗考



515
39



增 4
515
39



陳眉公訂正建州女直考



天都山 臣 輯

王以繩子長

校

王以純子建

按今女直即金餘孽也 國朝分為三種曰建
州曰海西曰野人而建州實居中雄長地最要
害定每歲以十月入貢正統初建州衛都督猛
可帖木兒為七姓野人所殺弟凡察子童倉遜

建州女直考

之朝鮮併失印時童倉弟董山嗣爲建州衛指揮亡何凡察童倉歸建州詔更予印比得故印凡察輒匿更給者乃更分建州左右衛剖二印令董山領左凡察領右而董山盜邊無虛月尋誅之邊備日嚴乞款貢而董山凡察後皆得襲顧時以報董山讐爲辭患苦塞上又襲破之後其酋完者禿貢馬請襲如故嘉靖二十一年建州夷李撒赤哈等入寇巡撫禦之已復稍戢萬

曆二十八年建州奴兒哈赤襲殺猛骨孛羅其勢始悍猛骨孛羅者與那林孛羅俱海西部落與奴酋三家俱封龍虎將軍猛最忠順虜或入犯輒預報諸夷惡之奴酋尤甚會猛酋與那酋讐殺猛力不支請救於邊不許願得爲障扞不許遂求援奴酋奴酋悉起兵以援爲名襲執之時邊臣遣使講救奴酋外恐吾聲罪實心利其妻妾部落乃僞以女許猛酋而陰縱其妾與通

徐以私外母名殺之仍以女許妻猛酋長子送
次子歸我內地以苟塞前講邊臣因不與較奴
酋自是有輕中國之心又先是奴酋父他失乘
醉入我邊堡邊吏誅之奴酋遂恨日與弟速兒
哈赤厲兵秣馬設險擺唐數年前精騎一萬今
且至數萬自三十四年以勒索車糧爲名遂不
復貢擁衆要挾侵犯遼陽而要其跋扈之勢已
成於襲殺猛酋之日矣按奴酋故部在清河邊

外窰官塔塞直開原之東而猛骨那林二酋部
落在鎮北撫順關外直開原東北與韃靼三衛
接壤奴酋所以不得通北虜以二酋爲之障也
猛酋亡矣那酋僅五千餘騎勢必亡亡則建酋
與北虜通矣勢豈小哉且建夷素獷捷喜馳獵
上下巖壁如飛浮馬渡江河不用舟楫夫北虜
善陸戰遇江河則股栗南夷習水道賴大海爲
隔越乃建酋兼水陸之長無河海之限由此言

之奴酋一日不死不可一日弛履霜之戒也敢考之以俟謀軍國者

跋遼陽圖女直考

自天厭夷德降生

真主北竄胡元我中土始得光天日月之蓋
皇祖另闢乾坤於遜伐之外其德固駕唐虞三代而上之矣乃邇歲建酋以旣燼之灰鴟張跋扈始則詭併部落繼則要挾不庭甚而駸

駸乎攸疆也豈唯授鉞者蒿目卽荷犁執耜
岩叟販夫有弗裂眦而呼亟欲顛其壘穴者
乎顧不稔察其境之透折不歷遡其類之從
滋亦何異望洋興嘆自茲圖考出而虜在吾
目中矣跡奴兒哈赤之吞猛酋也假女爲敵
餌委妾爲賄資雖狡黠百出哉無過一獸饒
之獸耳我

皇祖不階尺寸一朝而蕩腥羶豈以金甌鞏固

之日控弦幾何儲積幾何猛將謀臣幾何而
顧難彈一塵哉吾儕食土之毛忠憤橫臆然
有志竊未之逮唯同志者披圖而起長於謀
者輸謀長於力者輸力長於賄者輸賄共獵
此黠獸而齮之也庶不孤傳梨之意

天都山臣

陳眉公訂正建州女直考

終

陳眉公訂正燕市雜詩

雲間于燕芳著

擬陣亡諸將怨詩

十羊九牧一腐百累我兵何少賊衆何夥渾河湯
湯夷寨峨峨深林千疊重障百鎖彼伏我迷誰牧
誰煩賊兵一呼元首齊墮師貞在密期洩匪妥况
分匪合首尾相左悠悠蒼天誰爲此禍彼天誤國
借賊殺我

擬陣亡諸卒怨詩

燕市雜詩

我衆反寡見賊錯愕宜步而趨如風墮籜嗟六萬人齊死無作無已矣夷分太惡在昔從軍願從衛霍今如兒戲血枉染鏑無定河邊樂浪部落捷伐有靈終伸赫濯可柰戰場髑髏相薄誰復此仇引領新畧

三忠詩

劉將軍輓歌

劉將軍生何桓桓死何赫赫鴉骨閑連奴寨尺提兵深入虎子宅深入無前轉戰百牙梟銳氣賊幾

獲可柰矢盡受圍追望援援絕空歎息回首視死甘如飴死重太山非輕擲 至尊曰嗟嗟將軍而勇無功忠有益勇兒一點丹心赤身死名成垂竹帛如何膏國反面兒一副鬚眉枉似戟臣忠王聖世罕全勵世人人誓獻馘馘從茲可政俟齊斬奴頭碗奴魄

杜將軍輓歌

杜將軍生不逢時死反得謗渡河渾水春沉瀆殺賊日歸報 王上可柰登岸伏四起兵渡半潰不

得_上師出以律否臧凶往往舉事悔因充要惟七
尺分骹體一死無斬百神諒么麼曲筆胡太誑底
事任呼牛馬妄差賴千言有阿咸書入長安具白
狀時將軍在文呼嗟殺賊反殺將聽說東師堪懷
愴陽秋袞鉞幸無恙優卹早晚 絲綸貺從茲燕
頤都捐軀飲冰受斧盡依樣生為賊死死誅賊英
雄橫草不孟浪

潘僉事輓歌

一哭亡將軍雙淚墜紛紛再哭亡僉事啼聲誰忍

聞_使借為郎事 聖君含香起草筭班分何

東海西軍 主憂臣辱堪裂顴投筆自詫同定遠

請纓非浪學子雲子雲定遠也尋常氣奪老上龍

庭焚孰知公死死事勤蕩陰睢陽等氤氳 世廟

以來忠不鮮忠愍死諫公死戰內外總是五品銜

後先相映萬古擅凡死若斯死猶心二心馬用生

醜面千佛名榮世俗羨憤憤不識忠烈傳文臣如

公尤罕見 聖心哀悼食不嚙 御墨親題木主

絢尚方亟致金錢奠將來異數次第優賤奴惶恐

愁血濺

為劉晉仲悼亡四絕

玉鏡臺空乍掩粧
夕懸魄影照流黃
折蘭採艾候
台候弔罷靈均哭悼亡

孫楚文王且賦招
啼鵲故國半魂銷
新詩春曉翻

成識絲奏泠泠風任飄

彩筆誰家椒頌殘
愁來不禁舞孤鸞
香塵萬里橋
邊道潞水歸魂遶錦官

婦已作不歸人
銀蒜芳殘簾月新
洞口桃花原

有路許郎重入武陵春

附晉仲夫人春曉詩

曉來孤岫淡拖光
明暗冰輪一半藏
昨夜狂風

花落盡門前紅雨
惹泥香

晉仲云此雖婦詩實識也并白

西蜀劉暹具

徐眉公訂正物異考

崑山方鳳鳳 改亭著

繡水

陳 鉉 聲汝藏
吳 恕 復初校

序

語曰子不語怪蓋恐後世好奇之士立為變幻
不經之說以惑亂天下以此防民而邪說不
息然宇宙之廣氣類不齊人妖勿怪在在有之
予因閱史凡異之甚者輒記之庶資博聞者一
笑

非敢以惑衆也凡七條

水異

魯襄公時穀洛二水鬪將殷王室後數年有如日者五出於水秦武王時渭水赤三日昭王時又赤三日秦遂亡漢安帝時水赤如血 鄧后專政符堅遙見地色如水謂之地鏡堅遂死紹興中田水如爲物所吸聚而直行平地數尺程氏井水溢亦高數尺矯如長虹聲如雷二水相鬪十刻各退歸舊處乃解

火異

惠帝元康中武庫火燒異寶若王莽頭孔子履漢高斬白蛇劍及兵器一時蕩盡是後懷愍見殺太子之罰也天順中相國寺災見赤塊飛入門頃之北魏佛閣亦災齊武帝永明中魏地謠言赤火南流喪南國有沙門從北齋火至火赤於常火而小能療疾咸呼爲聖火病者取以灸至七炷卽愈

青異

哲宗政和中宮中青作狀先若屋倒聲其形丈餘

彷彿如龍金眼行動硜硜有聲黑氣蒙之腥血四
洒兵刃不能施或變人形亦或爲驢其出無時宣
和中洛陽有物如人或蹲踞如犬色正青方夜卽
出掠小兒傷食之後晝亦出入人家爲患謂之黑
漠二年乃熄哀帝建平中湖陵雨血廣三尺長五
寸大者如錢和帝建和中北地雨肉似羊肋大如
手魏公孫淵時襄平生肉長圍各丈許有頭目口
喙無手足而能動搖吳將鄧喜殺猪祠神治畢懸
之忽見一人頭往食猪肉喜引弓射之而中咋咋

作聲繞屋三日晉武帝太康中阿陰下赤雪三頃
劉聰建興中雨血深五寸赤氣至天中有赤龍奮
飛流星入紫微龍形有光落于平陽視之則肉甚
臭肉傍有哭聲晝夜不止數日聰后劉氏產一蛇
一獸各害人而走尋之不得頃之見於隕肉傍天
寶中楊慎矜父墓草木皆流血穰之慎矜裸而桎
梏於墓側血亦不止李林甫家東北隅每夜火光
先起衆小兒持火出入爲戲建炎中新城縣夜風
雪若數千人行聲歌笑雜擾昏黑莫辨窺之無所

見明旦雪中有人獸跡流血十餘里

木異

哀帝建平中汝南屋柱仆地生枝如人形身青黃色面白頭有鬚髮長六寸一分靈帝時有兩樗樹皆高四尺其一株宿夕忽暴長丈餘大一圍作胡人狀頭目鬚髮皆備劉曜時有大樹風吹折一宿忽變爲人形髮長一尺鬚眉三寸皆黃白色二手皆歛若欲揖者亦有二足着裙之態惟無目每夜有聲

金石異

元帝永昌中甘卓將襲王敦還家議事金石多變怪卓心疑索鏡照之不見其頭隄阜爲敦所襲後唐天成中僞漢掘古劍有文曰巳與水同宮王將耳口同日來居如山岫護重重蓋唐太宗巳亥生水固宮也其下三句爲聖君出三字成帝鴻嘉中大石如雷鳴二百里外野鷄皆應而鳴俗呼爲石鼓石鼓鳴則有兵魏明帝青龍中水湧寶曆負圖象如靈龜有石馬七隨之上有列宿鳥獸之形唐

垂拱中武威郡石化爲麵貧人取以給食熙寧中
益陽縣雷震山石盡裂出米十萬斛炊之成飯而
腥不可食頃之米黑如炭

人異

春秋文公時長狄兄弟三人被殺身橫九畝斷其
首而載之眉高於軾秦始皇時有大人長五丈足
履六尺皆夷服凡十二人見於臨洮漢景時下密
人年七十餘生角角有毛魏襄王時有女子化爲
人夫哀帝建平中豫章有男子化爲女子嫁人生

一子平帝元始中長安女子生兒兩頭異頸面相
向四臂共臂俱前向尻上有目長二寸靈帝時江
夏黃氏母浴而化爲黿入于深淵時出水上簪
猶在首元康中梁國女子嫁夫夫戍長安不歸父
母更以女適人女固不從強而配之尋病亡其夫
戍還遙至女墓開棺號呼女遂活後夫爭之不得
復歸前夫惠帝時京洛有人兼男女體亦能兩用
人道性尤淫元帝大興中有女子陰在腹又有女
子陰在頭俱好淫安帝義熙中無錫人趙末年八

歲一旦暴長八尺髭鬚蔚然三日而死儀鳳中衛
士胡丁年其妻吳氏生一男一女其胸相連其餘
體各異乃析之則皆死後又產二男亦相連至四
歲獻于朝淳熙中崑山縣石工採巧石石墮厭之
又三年六月他石工聞石呼聲報其家鑿石出之
見其妻喜曰久閉乍風我肌如裂俄頃聲微噤不
語化爲石人貌如生

虫異

天慶中吐蕃隴上出異獸如狼而腰尾皆青色青

迅猛見蕃人卽捕而食之遇漢人則不食漢文時
吳有馬生角右角三寸左角二寸靈帝和光中長
史馮巡馬生人惠帝大安中張聘所乘母牛言曰
天下亂乘我何之聘懼而還牛又曰歸何早也後
又人立而行後周建德中陽武有獸三狀如水牛
一黃一赤一黑赤與黑鬪久之黃者自傍觸之黑
者死黃赤俱入于河成帝咸和中豕生兩子皆人
面如胡人狀其身則豕隋開皇末渭南有沙門三
人行法於塲圃之上夜大豕與小豕十餘謂沙門

曰阿練我欲得賢聖道又有人家寄宿聞其家二豕對語 其一曰歲將盡阿爺將我殺何處避之其一荅曰可向水北姊家因相隨而去明日客告主人如其言覓之得二豕開皇中繁昌楊悅見雲中二物如羝羊黃色大如新生犬鬪而墜悅獲其一養之數旬失去成帝和平中長安石良劉音二人同居有人在室中作聲持杖擊之爲狗走出忽數人持兵至良家良等格殺皆狗也吳諸葛恪將朝犬啣衣止之如此者再乃令人逐犬遂升車入

朝是被害後主時凡內犬皆有官稱甚至開府僕同雌犬有夫人郡君之號天寶中李林甫將朝取書囊視之有物如鼠躍于地卽變爲狗雄目張牙欲嗜林甫卽射殺之惠帝永康中趙王倫旣篡得異馬莫能名有小兒見之曰服角馬醫倫將小兒入宮閉之深戶明日視之皆不見安帝雍熙中朱倚家婢炊飯郡鳥來啄不能逐有獵犬咋殺二鳥群鳥因共啄犬殺之盡噉其肉魏齊王正始中王周南爲邑長有鼠語曰王周南某日死王不應後

又語曰王周南今日日中死王又不應至日中鼠
煩盛而死慶元中鄱陽民家一猫帶數十鼠行止
食息皆同如母子相哺民惡猫殺之鼠舐其血

陳眉公訂正夷俗考

崑山方 鳳 改亭著

陳 鉉 聲汝藏

繡水 顏雲鳳 泰符校

序

夷俗本不足錄但憫其均是人也生於夷壞於
習拘於法終不可化然其間亦有好詩書守節
義終三年之喪無淫妬之女可見人性之善無
間夷夏而又幸我中國之人生此善地得見衣

冠禮樂之盛故畧述其俗之甚異者書之凡四條

東

馬韓國出大栗如梨鷄尾長五尺作土室如栗開戶於上少年勇力者以繩貫脊皮縫以大木權呼爲健以誇於人辰韓國以大鳥羽送死其意欲使死者飛升生見便以石壓其頭欲其匾故其國人皆匾頭行者相逢皆佞讓路倭國女子不淫不妬犯法者沒其妻子其俗以蹲踞爲恭敬飲食以手

而用籩豆後以女子爲王訖獄置小石於沸湯令法法者探之云埋曲手爛或置毒虫於甕令罪人曲者卽螫手國中有五經及佛經白居易集並於中國得之高句麗國叛反者縛之大柱燒而斬之盜則償十倍不能償者以子女爲奴拜則曳一脚於後立多反拱行必揮手俗尚淫男女相悅卽爲婚亦無聘財或有受財者人以爲賣婢高麗國知文字庶民子孫夜誦書晝習射宋時遣使進別叙孝經一卷越王孝經一卷新義八卷皇靈孝經一

卷孝經雌圖一卷又表求本板九經詔與之三歲一
試舉人有進士諸科等學每試百餘人登第者不
過一二十人地產龍鬚蓆白砥紙狼尾筆士女服
尚素每十二月朔王註京官外官則付國相又有
國子監四門學生徒六千人貢士有三等王城曰
士貢郡邑曰鄉貢他國人曰賓貢既試之王親試
以詩賦論病不服藥惟呪咀厭豚子拜父亦答半
禮挹婁國東以豕膏塗身厚半寸以禦寒夏則裸
以尺布蔽前後其人臭穢坐則箕踞以足挾肉

啖之若冷肉則坐其上令溫煖將嫁娶男以毛羽
搏女頭方卜日人死卽日葬之殺猪積墓上以爲
死者之糧有哭者謂之不壯勿吉國嚼米爲酒亦
能醉人俗以澗洗手面初婚之夕男就女家執女
乳方成婚妻若淫人告其夫夫輒殺妻而又悔必
殺告者由是淫婦終不發扶桑國其地多扶桑木
故名葉似桐初生如笋國人食之實如梨而赤以
皮爲紙有大牛角載二十斛女斛女國女人潔白
有毛髮長委地二三月後入水則有娠六七月而生

女人胸前無乳項後毛中有汁可以乳子五日能
行三四歲則成人矣

西

乙弗敵人不食五穀惟食魚與蘇子狀如苟杞子
或赤或黑見他國人便走避其行如飛吐蕃君與
臣爲友號曰共命其數不過五人君死之日共命
人日夜縱酒於脚下針血出盡乃死殉葬又有君
所親信者用刀鋸腦或以木刺兩肋死亦殉焉大
食國海中有一方石石上有樹赤枝青葉樹上生

小兒長六七寸見人不語而能笑人摘取入手卽
乾黑大羊同人皆髯髮多風雪冰厚丈餘俗無文
字但刻木結繩而已其首長死抉去腦實以珠玉
五臟皆以黃金易之又造金鼻銀齒以人殉葬大
月氏國人乘四輪車用八牛挽之能鑄石爲五色
琉璃光彩奪目康居國人皆深目多鬚釀葡萄酒
至千石十年不敗以六月一日爲歲首至此日王
及人庶剪鬚髮馬上射七日俗尚天神云神見七
日死失骸首其日國人徒跣號哭求天見骸首置

一院畜狗甚多人死置院內令狗食之天竺國有
飛梯地道木牛流馬之法其人皆學悉墨章書於
貝多樹葉以紀事獅子國舊無人止有鬼神有龍
居之諸國來市場不見人形但百貨俱集且示價
商人依價償而取之諸國聞其爲樂土因止其地
遂成大國三童國人眼皆三時珠或有四舌皆能
言語短人國人長三尺亦有二尺者頭少髮有大
鳥高七八尺每啄食之短人持弓矢以自備波斯
國有大鳥形如橐駝有兩翼飛不能高能啖人若

有叛者鉄灼其舌瘡白爲直黑爲曲又有汚禡蛇
狀類鼠青色長八九寸能入穴取鼠悅般國人能
割人喉斷擊人頭骨碎陷血以草藥納口中須臾
血止復生亦無癍痕東女國子從母姓不從父姓
每年十月巫者至山中布糲與麥呪呼乂之俄有
鳥來如鷄狀剖視之腹中有穀者歲豐否卽大灾
名曰鳥卜人死剝其皮藏之骨肉皆納甕中而瘞
之吐火國男多女少兄弟通室婦人有五夫則首
戴五角十夫則十角無兄弟者結義他人方得共

妻否則終身無婦矣生子屬長兄

南

盤瓠之後曰僇生子能行燒鉄石烙其踝躄故履
茨根而不傷試刀必以牛一割卽殊者良刃也歲
首祭盤瓠雜採魚肉酒飯於木槽群聚而號爲盡
禮男女相得則男至女群咿嗚負所愛女而去其
父母方喜若女二年男不負者父母以女爲人所
棄每欲殺之其人性同禽獸父子相殺惟手有兵
刃者先之旣殺父走避於外求得一狗以謝其母

不復嫌恨若報仇殺人必食之兒女死一哭而止
親戚私相賣賣者號哭不服卽將買主入官爲奴
俗尚淫祀且畏鬼甚有賣身以供祭祀者附國人
累石爲巢高十餘丈妻其群母及嫂父亦納子之
妻人死覆以獸皮舞劔而呼云鬼取我父我必殺
鬼西原蠻洞王酋率娶數妻皆號曰嬖娘其洞官
家婚姻聘禮干擔婚來就親女家於五里外結草
屋與居男女婢僕甚多成婚之夕兩家各盛兵爲
備小有言則相鬪婚能殺婢則妻室畏之否則謂

之懦居半年方歸夫家人有遠出歸者止三十里
外遣巫提竹籃脫遠歸人家貯於內前行言爲行
人收魂歸也尾濼蠻其人有尾長三四寸欲坐先
穿地爲穴以安尾尾折便死能食人惟識母不識
父有賓客殺老者以供厨賓婚有期老者必泣黎
峒蠻居室架木兩重上以自居下以蓄牧婚姻折
箭爲定親死食生牛肉以爲哀痛葬則昇櫬令人
擲鷄子於地不破處卽爲吉穴客至主人出不
一言置酒先以真味客若食不辭則喜少有嫌

則逐客凡會飲人人持刀三杯後方已然亦置刀
身傍一語不合則起而相戕商人負其一錢十年
必獲而後已或誤殺其一鷄則鳴鼓告衆曰當償
一鬮者雌雄各一也又笑每生鷄子若干必至數
倍乃已哥羅國征伐皆乘象每一隊象百頭每一
象百人衛之有官者方留髮嫁娶以槓擲爲禮死
則焚尸盛以金甕沉于海頓遜國有酒樹似安石
榴採其花汁停甕中數日成酒人將死親賓歌舞
於郭外有鳥如鵝口如鸚鵡而紅色飛來食死人

肉盡乃燒其骨沉海中以爲上等人也

北

烏桓國嫁娶先私通百日後方行禮婚至婦家朝
朝拜其妻而妻之父母則不拜爲妻家僕役一二
年妻家乃更厚遣送女凡事只從婦謀能作白酒
如中國之味而不知作麪病者燒石自熨或刺血
出親死歌舞殯之燒熟犬并死人衣物殉之鮮卑
國婚嫁先髡頭至三月男女大會然後各從所愛
者配合獸有野

角端異於他國高車國初

奴單于生二女甚美單于曰此女安可配人
以與天乃築臺置二女於上請天自取之有一老
狼日夜守臺而嗥臺下作穴若居室之狀其小女
曰父命天來迎此必天使取我乃下臺爲狼妻生
子遂成高車國其人好引聲長歌有似狼嗥都波
國結草爲廬無牛羊不知耕稼取百草根爲糧緝
鳥羽爲衣人死以櫃盛尸置樹上任鸞鳥食之契
丹國有鉄旬水醜濁如血又有女真人善作鹿鳴
野鹿皆至射而取之又能釀糜爲醪醉則縛之醒

則解不然多殺人其後化爲狗國人身狗首長毛
不衣能爲犬嗥其妻皆漢人能漢語生男爲狗生
女爲人穴居食生而妻女熟食嘗有人至其國其
妻憐之乘其狗夫出使迯歸臨行與筋十餘隻教
其每走十餘里遺一筋狗夫追之見筋知爲已家
物必歸則不能追矣室韋國以皮爲舟屈木爲室
以豬皮爲蓆婚嫁兩家相許婿盜婦去然後行聘
禮婦人不再嫁以爲死人妻難共居也雜度寐人
甚長髮皆裹頭人輕健一跳三丈又能於水中立

浮臥浮履水而行如陸地然黠戛斯國赤髮哲面
綠瞳以黑髮爲不祥黑瞳爲野種男子黥手女子
黥項謂歲首爲茂師哀以三哀爲一時

陳眉公訂正夷俗考

終

